

25-bob. Nikoh tuzilganligini qayd etish

Qarang: O‘zbekiston Respublikasi Vazirlar Mahkamasining 2016-yil 14-noyabrdagi 387-sonli qarori bilan tasdiqlangan “Fuqarolik holati dalolatnomalarini qayd etish qoidolari”ning V bobi (“Nikohni qayd etish”).

212-modda. Nikoh tuzilganligini qayd etish joyi va vaqti

Nikohni qayd etish nikohlanuvchi shaxslardan birining yashash joyidagi fuqarolik holati dalolatnomalarini yozish organlari tomonidan amalga oshiriladi.

Alohida hollarda nikohni qayd etish kasalxona yoki uyda amalga oshiriladi.

Nikohni qayd etish tantanali vaziyatda amalga oshirilishi mumkin.

Nikohlanuvchilar fuqarolik holati dalolatnomalarini yozish organiga nikoh qayd etilishidan bir oy ilgari nikohga kirish to‘g‘risida ariza beradilar.

213-modda. Nikohni qayd etish uchun taqdim etiladigan hujjatlar

Nikohga kirishni xohlovchilar ariza berish chog‘ida o‘z shaxsini tasdiqlovchi hujjatlarni, ilgari nikohda bo‘lgan shaxslar esa, avvalgi nikoh tugatilganligi haqidagi hujjatlarni ham taqdim etishi lozim.

214-modda. Nikohga kirayotganda familiya tanlash

Nikohlanuvchi shaxslar nikohga kirish to‘g‘risidagi arizalarida umumiy familiya olish yoki nikoh tuzilganidan keyin ham o‘z familiyasida qolish haqidagi istaklarini ko‘rsatishlari shart.

215-modda. Nikoh tuzilganligi to‘g‘risida guvohnoma.

Hujjatlarga qo‘yiladigan belgilar

Nikoh tuzilganligi qayd etilganidan keyin nikoh tuzilganligi to‘g‘risida guvohnoma beriladi.

Shu bilan bir vaqtda shaxsni tasdiqlovchi hujjatlarga nikoh qayd etilganligi to‘g‘risida belgi qo‘yiladi.

Er-xotindan birining familiyasi o‘zgarganda shaxsni tasdiqlovchi hujjatga uni almashtirish lozimligi to‘g‘risida belgi qo‘yiladi.

216-modda. Fuqaroligi bo‘lmagan shaxslar bilan nikoh tuzilganligini qayd etish

O‘zbekiston Respublikasi fuqarolarining O‘zbekiston Respublikasi hududida doimiy yashovchi fuqaroligi bo‘lmagan shaxslar bilan nikoh tuzganligini qayd etish umumiy asoslarda amalga oshiriladi.

217-modda. Nikoh tuzilganligini qayd etishning alohida hollari

Tergov hibsonalarida, ozodlikdan mahrum etish tariqasidagi jazoni ijro etuvchi muassasalarda saqlanayotgan shaxslar bilan tuziladigan nikohni qayd etish ushbu muassasa joylashgan yerdagi fuqarolik holati dalolatnomalarini yozish organlarida qonun hujjatlarida belgilangan tartibda amalga oshiriladi.

(217-moddaning matni O‘zbekiston Respublikasining 2011-yil 29-sentabrdagi O‘RQ-299-sonli Qonuni tahririda — O‘R QHT, 2011-y., 40-son, 410-modda)

Qarang: O‘zbekiston Respublikasi Vazirlar Mahkamasining 2016-yil 14-noyabrdagi 387-sonli qarori bilan

tasdiqlangan “Fuqarolik holati dalolatnomalarini qayd etish qoidalarini”ning V bobi 3 paragrafi (“Ozodlikdan mahrum etish joylaridagi shaxslar bilan nikohni qayd etish”).